



## **Kalaallit Nunaata Eqqartuussiviani nalunaarsuiviup ammaqqikkiartuaarnera**

### Tunuliaqut

COVID-19-imik ilungersunartorsiornerup malitsigisaanik Kalaallit Nunaanni Eqqartuussiviup nalunaarsuiviata ajornartorsiornermi upalungaarsimanermik suliniuteqarneq aallartippaa piffissami ulloq 20. marts 2020-miit ulloq 27. april 2020-mut atuuttumik. Kalaallit Nunaanni Eqqartuussiviit ulloq 27. april 2020-mi aallartittumik aammaaqikkiartuaarlutik aallartipput. Ammaqqinneq nunatsinni peqqinnissaqarfiup innersuussutai naapertorlugit pivoq.

Ammaqqinnerup ingerlanerani Nalunaarsuivimmi sulisut taamaattumik nikittaallutik sulissapput, tunillanneqarneqaratarsinnaaneq minnerpaaffianiitinniarlugu. Taamaattumik naatsorsuutigineqartariaqarpoq suliat suliarineqarnerinut piffissap atorneqartup takinerusinnaanera, Kalaallit Nunaanni Eqqartuussiviit ajornartorsiornermi upalungaarsimanermik suliniuteqarnerini.

Nalunaarsuivimmut takkulluni oqarasuaatikkulluunniit saaffiginninnerit periarfissaanngitsut  
Allagartanik uppernarsaatinik ornigulluni tunniussinissaq aallernissarluunniit periarfissaassanngilaq. Takkulluni imaluunniit oqarasuaatikkut Nalunaarsuivimmut saaffiginninnerit aamma periarfissaassanngillat.

### Allagartanik uppernarsaatinik tigooqqaaneq

Allagartat uppernarsaatit nalunaarsorneqartussat, piffissami allakkatigut nassiunneqartassapput.

Periarfissaassaaq mailikkut nalunaarsuivimmut allagartat uppernarsaatit nalunaarutiginnissaat, telegrafiskimik nalunaarutiginninnermut inatsit malillugu, nalunaarsuisarnermut nalunaarummi § 27, imm. 1, aamma nalunaarsuisarnermut malittarisassiami § 20, imm. 1 malillugu. Allagartaq uppernarsaat mailimut skanniganngorlugu kakkiunneqassaaq tamatumalu kingorna Nalunaarsuivimmut allakkatigut nassiunneqassaaq. Allagartaq uppernarsaat aamma ornigulluni tunniunneqarsinnaavoq, upalungaarsimanermi suliniarneq qaangiuppat. Nalunaarsuivimmi mailikkut allagartamik uppernarsaammik tigusinermut ulluliunneqarsimasup atuutitiinnarneqarnissaanut, piffissaq killiunneqartoq tassaavoq qaammatit arfinillit, Kalaallit Nunaata kangianiilli allagartat uppernarsaatinut tiguneqartunut ukioq ataaseq.

Nalunaarutiginninneq [registreringspost@domstol.gl](mailto:registreringspost@domstol.gl) -imut pissaaq.

Sammissap suuneranik nalunaarfissami allagartamut uppernarsaammut illumut tunngasumut (atugarsuarmut) allanneqartariaqarpoq: "Nalunaarutiginninneq im. Nalunaarsugaq piigassaq, B-no.,

peqarpallu EL-n., Illoqarfik”. Allagartanik uppersaatinik arlalinnik nalunaarsugassanik aamma/imaluunniit nalunaarsukkanik piigassanik illumut ataatsimut tunngasunik nalunaarutiginninneruppat, paarlattuanik allanneqassaaq: ”Allagartat uppersaatiit ataatsimoortut, B-no., peqarpallu EL-no., Illoqarfik”.

Sammissap suuneranik nalunaarsuivimmi allagartamut uppersaammut, inunnut imaluunniit inunnut inatsisitigut nalunaarsukkanut (inuit nalunaarsorneqarfiat) allanneqartariaqarpoq: ”Nalunaarutiginnineq im. Nalunaarsugaq piigassaq, Ateq(it), Naggat(it)/Suliffeqarfiup aqqa, CVR-no.” Inuup normua allanneqartariaqanngilaq inunnut tunngasunik sammissap suunerani nalunaarsuivimmi.

Allagartamut uppersaammut ataatsimut imaluunniit allagartanut uppersaatinut ataatsimoortunut illumut tunngasumut imaluunniit inummut(nnut) imaluunniit inummut(nnut) inatsisitigut nalunaarsukkamut(nut) maili ataaseq nassiunneqartassaaq. Taamaalilluni allagartanik uppersaatinik illunut assigiinngitsunut tunngasunik imaluunniit inunnut imaluunniit inunnut inatsisitigut nalunaarsukkanut assigiinngitsunut tunngasunik mailimi ataatsimi nassiussisoqquusaanngilaq.

Piginnittut nalunaarsorneqarnerinik paasissutissiinerit

Piginnittut nalunaarsorneqarnerinik paasissutissiisoqarnissaanik noqqaanerit [registreingspost@domstol.gl](mailto:registreingspost@domstol.gl) –imut nassiunneqassapput.

Atuisut, immikkut ittumik amerlasuunik piginnittut nalunaarsorneqarnerinik paasissutissanik ataatsikkut pisariaqartitsisut, immikkut isumaqatigiissuteqariarlutik piginnittut nalunaarsorneqarfiinik misissuisinnaapput.

Sullissineq

Nalunaarsuiviuk pingaarnersiulluni allagartat uppersaatiit tiguneqartut pigisanut inunnullu nalunaarsuivimmeersut aamma tamatumunnga tulliuullugit piginnittut nalunaarsorneqarnerinik paasissutissiinissammik noqqaassutit mailikkut akisassavaat.

Allagartanik uppersaatinik utertitsineq

Allagartat uppersaatiit nalunaarsoriikkat nalunaaruteqartumut allakkatigut nassiunneqartassapput. Qularnaveeqqusiussaqarlunili taarsigassarsinermi allagartanut tunngasut allakkatut tammatsaalisatut nassiunneqartassapput. Allagartat uppersaatiit arlallit ataatsikkut nalunaarutiginnittumit ataatsimit nalunaarutigineqarpata, utertitsineq allakkatut tammatsaalisatut pisassaaq, allagartaq uppersaatiit ataaseq imaluunniit arlallit qularnaveeqqusiulluni taarsigassarsinermi allagartamut tunngappat.

Allannguutit

Nalunaarsuiviup upalungaarsimanermi suliniarnera ataavartumik nalilersorneqassaaq, aallannguutaagumaarsinnaasullu Kalaallit Nunaanni Eqqartuussiviit nittartagaatigut [www.domstol.gl](http://www.domstol.gl) –kkut nalunaarutigineqartassapput.